



SAKSFRAMLEGG

| Saksnr: | Utval: | Dato |
|---------|------------------------|------|
| | Bygdeutviklingsutvalet | |

| Sakshandsamar: | Arkiv: | ArkivsakID |
|-----------------|----------------|------------|
| Tore Henrik Øye | FE-223, FA-V12 | 22/945 |

HANDSAMING AV SØKNAD OM BYGDEUTVIKLINGSMIDLAR TIL STAMNES FISKEFESTIVAL 2023

Vedlagte saksdokument:

Søknad til bygdeutviklingsmidlar til Fiskefestivalen på Stamnes i 2023 - ny søknad

Kommunedirektøren sitt framlegg til vedtak:

Bygdeutviklingsutvalet vurderer tilskot til Stamnes Fiskefestival i 2023 med utgangspunkt i kr. 30 000,- i tilgjengelege fondsmidlar til fordeling.

Saksopplysningar:

Samandrag/konklusjon (kort om saka)

Bygdeutviklingsutvalet har kr. 265 000,- til dispensasjon ved gjeldande søknadsomgang, med men bakgrunn i kr. 760 000,- i samla søknadsbeløp (11 søknadar). I tillegg har utvalet kr. 15 000,- i restmidlar frå tidlegare.

Stamnes Bygdalag søker om kr. 40 000,- i tilskot til gjennomføring av Stamnes Fiskefestival i 2023.

Bygdelaget søkte om det same tilskotsbeløpet til årets festival ved førre søknadsrunde (mars -23), men fekk avslag. Søknaden er no fremja på nytt.

Programmet for fiskefestivalen, med kostnader, ligg ved søknaden.

Kommunedirektøren gjer framlegg om å ikkje løyve midlar til festivalen i 2023, men viser til unyttta midlar på kr. 30 000,- som Bygdeutviklingsutvalet eventuelt kan gjere nytte av.

Sjå påfølgjande saksutgreiing for nærare forklaring og grunngeving.

Bakgrunn for saka

Bygdeutviklingsutvalet har kr. 265 000,- til fordeling ved søknadsrunden i september 2023. Det er samla sett søkt om kr 760 000,- i tilskot, fordelt på 11 søknadar.

I søknaden sin av 05.08.23 søker Stamnes Bygdalag, på vegne av friviljuge lag på Stamnes, om kr. 40 000,- i bygdeutviklingsmidlar til Stamnes Fiskefestival for 2023.

Det vart også søkt om det same beløpet til årets festival, ved søknadsomgangen i mars 2023. Her gav Bygdeutviklingsutvalet avslag. Grunngevinga var at utvalet løyvde kr. 40 000,- i tilskot til festivalen i 2022, og at det ut frå avgrensa midlar, ikkje vart prioritert å gje tilskot til det same arrangementet fleire gonger, med unnatak for nyskaping ar i programmet.

Bygdalaget opplevde avslaget som svært skuffande og lite motiverande. Det er difor fremja ny søknad, ut frå at andre festivalar i kommunen fekk tilskot frå bygdeutviklingsutvalet i 2023. Dette ser søkjar på som urettferdig, og meiner det ikkje kan vere slik at festivalane i stasjonsbyane får midlar, medan dei små, som ligg i utkantane, ikkje får noko. Her peikar også søkjar på at festivalen deira, så absolutt, er i tråd med retningslinene for bruk av bygdeutviklingsmidlane, i form av eit variert program med aktivitetar og opplevingar for alle – i alle aldrar.

Søkjar presiserer elles at Stamnes Fiskefestival er svært viktig for bygda, der det vert lagt ned mykje friviljug arbeid for å gjennomføre årlege festivalar. Samstundes har det vist seg at det er vanskeleg å få innbyggjarar frå andre stader i kommunen, til å kome på arrangementet. Det vert difor sett opp transporttilbod med buss og båt, med ekstra utgifter som ikkje andre arrangørar har, i følgje søknaden.

Årets festival vart som vanleg arrangert den siste helga i juni. Nytt av året var at ungdom mellom 12 og 18 år fekk inngang på show med Vinskvetten, i følgje av vaksne, som mange nytta seg av.

Kostnad- og finansieringsplanen for arrangementet var som følgjer:

| Tekst | Utgifter (kr.) | Finansiering (kr.) |
|---|------------------|--------------------|
| Estimerte kostnader, totalt (sjå vedlegg for spesifisering) | 354 000,- | |
| | | |
| Billettsal | | 156 000,- |
| Sal av varer | | 86 000,- |
| Gåver/sponsorinntekter | | 32 000,- |
| Eigeninnsats | | 40 000,- |
| Søknad, tilskot bygdeutviklingsmidlar | | 40 000,- |
| SUM | 354 000,- | 354 000,- |

Nærare informasjon om søknaden og arrangementet går fram av vedlegg.

Formelt grunnlag:

- «Retningsliner for tilskot til bygdeutvikling», vedtekne 26.05.20.
<https://www.vaksdal.kommune.no/innhald/landbruk-nering-og-skatt/bygdeutvikling/retningslinjer-for-tilskot-til-bygdeutvikling/>

Vurdering og konsekvensar:

Søknaden vert vurdert som tilstrekkeleg opplyst for sakshandsaming og vedtak etter gjeldande krav.

I følgje bygdeutviklingsmidlane sine retningsliner, skal midlane brukast til ålmennyttige føremål og leggje til rett for aktivitet i bygdene, med varierte opplevingar og levande bygdeliv. Stamnes fiskefestival innfrir desse målsetjingane.

Som nemnd i saksutgreiinga, har Bygdeutviklingsutvalet ved fleire høve gjeve tilskot til festivalar i kommunen. I denne samanheng er grunnlaget for slike tildelingar vurdert og drøfta, både i saksutgreiingane frå administrasjonen og av Bygdeutviklingsutvalet.

Det har vore diskusjon om ein i det heile, skal gje tilskot til faste, årlege festivalarrangement, der ein i stor grad byggjer på billett- og salsinntekter. Dette med bakgrunn i at det er avgrensa med bygdeutviklingsmidlar til disposisjon. Ei tildeling til slike festivalar vil difor kunne gå ut over tildelinga til nye/andre initiativ. Samstundes utgjør festivalane vanlegvis årlege tilbod, med fast program og etablert drift i høve til organisering og økonomi. Programma er innhaldsrike, med aktivitets- og opplevingstilbod, men tilskot til festivalane, spesielt over fleire år, vil kunne sjåast på som driftstilskot. Dette skal ikkje midlane nyttast til, i følgje retningslinene for bygdeutviklingsutvalet. Eit naturleg unnatak vil likevel vere om festivalane kjem opp med klare nyskapingar, som utviklar programmet og når nye målgrupper, saman med at kostnadane aukar.

Stamnes Fiskefestival var den første fiskefestivalen som fekk bygdeutviklingsmidlar, med tildeling i 2022, medan det også vart gjeve midlar til Elvebrus i 2022 og 2023, og Daledagane og Vintertreffet i 2022.

Tildelingane fordeler seg som følger:

- Stamnes Fiskefestival 2022 : kr. 40 000,- (kulturarrangement, utbetalt)
- Elvebrus 2022 : kr. 75 000,- (nyetablering, utbetalt)
- Elvebrus 2023 : kr. 40 000,- (vidareutvikling, utbetalt)
- Daledagane 2022 : Inntil kr. 50 000,- (underskotsdekning, utbetalt)
- Vintertreffet 2023 : Inntil kr. 50 000,- (underskotsdekning)
Det vart òg gjeve kr. 10 000,- til innkjøp av stolar i 2021, der tilskotet hadde fleirbruksnytte for felles samsfunnsal.

Som oversynet viser, er det noko skilnad mellom beløpa som er løyvde, om enn i relativt liten grad. Elvebrus skil seg ut, både i tilskotsbeløp og at festivalen har fått løyvingar to gonger. Det første beløpet tok utgangspunkt i at festivalen vart etablert i 2022, med vesentlege etableringskostnadar, der Bygdeutviklingsutvalet la vekt på å støtte opp om ei nyskaping. Løyving nummer to, i 2023, vart grunngeve i ein vesentleg utvikling av festivalen, gjennom tilbod til nye målgrupper, med påfølgjande investeringsbehov. Kommunedirektøren meiner difor at det var gode argument for dei to tildelingane.

I sum meiner Kommunedirektøren at festivalane er handsama relativt likt, der skilnadane er gjeve greie for. Prinsippet bak tildelingane, ut over tilskot til eitt arrangement per festival, er at Bygdeutviklingsutvalet ikkje kan gå inn på fleirårige tilskot til drift og vidareføring, heller ikkje for å dekkje eventuelle underskot, med unnatak for nyskapingar. Dette vil i for stor grad gå ut over tildeling til andre, moglege tiltak og initiativ, i ein situasjon med avgrensa midlar. Ved eventuell, framtid finansiering frå kommunen til nemnde festivalar, kan det difor vere meir tenleg å gje tilskot gjennom årlege budsjett, eller som øyremerkte tilskotsmidlar.

Kommunedirektøren vel å ikkje gje innstilling til søknaden om tilskot til Stamnes Fiskefestival i 2023, men viser til tilgjengeleg restpott på kr. 30 000,-, som Bygdeutviklingsutvalet kan gjere nytte av, om det vert funne tenleg.